

आकाशवाणी जयपुर—अजमेर
प्रादेशिक समाचार

दिनांक 01.06.2024

समय: 18.45 बजे

- सातवां अर आखिरी दौर मांय वोट पडबा सागे ई 18वीं लोकसभा रा चुनाव मांय वोट देवण रो काम पूरो व्हयो—सातवां दौर मांय 58 फीसदी ऊं बत्ता वोट पड्या।
- मुख्यमंत्री भजनलाल शर्मा आला दर्जा रा अहलकारां री मीटिंग ले र प्रदेश मांय कानून—ब्यवस्था रा हालात रो जायजो लीनो।
- राज्य मांय केई ठोडां आंधी—बारिश रे कारण पारो उतर्यो।
- सुप्रीम कोर्ट राजस्थान लोक सेवा आयोग कानी ऊं लीरीजी पशु चिकित्सा अधिकारी भर्ती प्रक्रिया माथे रोक हटाई।

000

लोकसभा चुनाव रा सातवां अर आखिरी दौर रा तैत आज 57 सीटां सारू शांति सागे वोट पड्या। निर्वाचन आयोग कानी ऊं दीरीजी जाणकारी रे मुजब सिंज्यां पांच बज्या तांई आं हलकां मांय **58 दशमलव 34 फीसदी** वोट पड्या। वोट देवण रा आखिरी दौर सागे ई लोकसभा चुनाव रा तैत सगळी सीटां माथे वोट देवण रो काम पूरो व्हे ग्यो। सगळा सात दौर मांय पड्या वोटों री गिणती 4 जून ने करी जावेला। ई सारू मतगणना केन्द्रां माथे हिफाजत सागे सगळा जरूरी इंतजामात करी ज्या है।

000

मुख्यमंत्री भजनलाल शर्मा आज जयपुर मांय आला दर्जा रा अहलकारां सागे मीटिंग कर र प्रदेश मांय कानून-व्यवस्था रा हालात रो जायजो लीनो। मीटिंग मांय गृह अर पुलिस विभाग रा आला अहलकारां सागे ई वीडियो कांफ्रेंस रे मार्फत रेंज रा पुलिस महानिरीक्षक अर जिलां रा एस.पी. ई सिरकत कीनी। मीटिंग मांय मुख्यमंत्री कह्यो के सरकार जनता मांय पुलिस माथे भरोसो अर अपराधियां मांय डर बणायो राखण माथे खास ध्यान दे रही है। वे कह्यो के अपराध री मोटी वारदातां व्हेवण परां संबंधित अहलकारां री जिम्मेदारी अर जवाबदेही तय करी जावणी चाहिजे। मुख्यमंत्री भ्रष्ट अहलकारां ने सजा देवण अर ईमानदार अहलकारां ने बधावो देवण री जरूरत माथे जोर दीनो। मुख्यमंत्री नशीली चीजां री तस्करी करण वाळां रे खिलाफ ई करडी कार्रवाई करण रा हुकम दीना। मुख्यमंत्री साइबर अपराध अर नशा रे खिलाफ जनता मांय जाग जगावण सारु अभियान चलावण बाबत् ई कह्यो।

00000

प्रदेश मांय प्रशासनिक अहलकार जिला कलेक्टर गांवां मांय जा र व्यवस्थावां रो जायजो ले रह्या है। **बारां** रा जिला कलेक्टर रोहिताश्व सिंह तोमर किशनगंज उपखंड री जलवाडा ग्राम पंचायत मांय काल रात्रि चौपाल लगा र जनता री पाणी, बिजली अर सड़क ऊं जुड़ी परेशानियां सुणी अर अहलकारां ने जरूरी हुकम दीना। **चूरु** री जिला कलेक्टर पुष्पा सत्यानी ई ताल छापर मांय रात्रि चौपाल लगा र जनता री समस्यावां सुणी अर अहलकारां ने जरूरी हुकम दीना। **केकड़ी** रा अतिरिक्त जिला कलेक्टर दिनेश धाकड़ जूनिया गांव मांय रात्रि चौपाल लगा र गांव वाळां री बिजली ,पाणी , ईलाज ऊं जुड़ी अर दूजी समस्यावां सुणी अर अहलकारां ने जरूरी हुकम

दीना। वे तेज गर्मी, डेंगू, मलेरिया अर मच्छरां रे कारण व्हेवण वाळी दूजी बीमारियां री शंका ने ध्यान राखता थकां सामुदायिक स्वास्थ्य केन्द्र रो दौरा ई कीनो।

00000

झुंझुनूं मांय लारला दिनां एक महिला री गलत किडनी निकाळ देवण रा मामला मांय आरोपित डॉ. संजय धनखड़ रे खिलाफ कोतवाली थाणा मांय रपट दर्ज करायी ज्यी है। एस.पी. राजर्षि राज वर्मा आ जाणकारी दीनी। वे बतायो के मेडिकल बोर्ड कानी ऊं करी ज्यी जांच पाछे मिली रपट मांय डॉ. धनखड़ री लापरवाही सामी आवण परां कोतवाली मांय रपट दर्ज करायी ज्यी है। वर्मा बतायो के मामला री जांच शहर कोतवाल पवन चौबे ने सूंपी ज्यी है।

जिला कलेक्टर चिन्मयी गोपाल गलत ऑपरेशन करण रा आरोपित डॉ. संजय धनखड़ रो राजस्थान मेडिकल काउंसिल मांय रजिस्ट्रेशन निरस्त करण सारु चिकित्सा विभाग ने कागद भेजी ज्यो है।

00000

तेल कंपनियां कारोबार मांय काम लेवण सारु गैस री टंकियां रा मोल मांय साढे 69 रुप्या री कमी कीनी है। ई सागे ई हवाई जहाज मांय काम आवण वाळो तेल ई साढे छह फीसदी सस्तो करी ज्यो है।

0000

प्रदेश मांय आज बादळा अर छांटो-छिड़को व्हेवण ऊं पारो थोड़ो उतर्यो। कोटपूतली-बहरोड़ जिला रा कोटपूतली अर विराटनगर हलकां मांय आज मेह बरस्यो, जिण ऊं गर्मी रो असर थोड़ो कम पड़्यो। श्रीगंगानगर अर हनुमानगढ़ जिलां मांय सिंज्यां री पोर आंधी चालण अर छांटो-छिड़को व्हेवण ऊं गर्मी ऊं थोड़ी साता मिली। भरतपुर मांय ई हल्की बिरखा ऊं गर्मी रो असर थोड़ो कम पड़्यो। राजधानी जयपुर मांय ई सिंज्यां री पोर छांटो-छिड़को व्हेवण ऊं गर्मी ऊं साता मिली।

जयपुर ग्रामीण जिला रा फुलेरा अर जोबनेर हलका मांय ई तेज बिरखा अर रेनवाल मांय व्ह्या छांटा-छिड़का ऊं गर्मी ऊं आराम मिल्यो। दौसा मांय ई तेज बायरो बाजण सागे बिरखा व्ही। चूरु मांय आंधी चाली। सीकर जिला मांय ई छांटा-छिड़का रा समाचार है। करौली जिला मांय ई आंधी चाली। जैसलमेर जिला रा लाठी हलका मांय सामाजिक संगठनां री ओर ऊं ढांढा-ढोरं अर परिंदां सारु पाणी री व्यवस्था करी जा रही है।

टोंक जिला रा मालपुरा मांय ई अदालत परिसर मांय पंछियां सारु परिण्डा बांधी ज्या। जालौर जिला मांय पड़ रह्या तेज तावड़ा ने ध्यान राखता थकां भीनमाल री कच्ची बस्तियां मांय टैंकरां रे जरिये पीवण रो पाणी मुफ्त मांय मुहैया करायो जा रह्यो है। हनुमानगढ़ जिला मांय पड़ रह्या तेज तावड़ा ने ध्यान राखता थकां कोचिंग सेंटरां मांय पढाई ऑनलाईन तरीका ऊं करावण रा हुकम दिया ज्या है। मौसम विभाग रा जयपुर केन्द्र रा निदेशक राधेश्याम शर्मा आवता 24 घंटां मांय जयपुर, भरतपुर अर बीकानेर संभाग रा कुछ हलका मांय तेज आंधी चालण अर बिरखा व्हेवण रा आसार जताया है।

.....

दूजी कानी प्रदेश मांय सैर-सपाटा री एकली पहाड़ी ठौड़ माउंट आबू मांय सुहावणा मौसम रो मजो लेवण सारू मोटी तादाद मांय सैलानी पूग रह्या है।

.....

00000

सुप्रीम कोर्ट राजस्थान लोक सेवा आयोग-आरपीएससी कानी ऊं सरू करी ज्यी पशु चिकित्सा अधिकारी भर्ती प्रक्रिया माथे रोक हटा लीनी है। आयोग 22 अक्टूबर 2019 ने ई भर्ती सारू विज्ञप्ति जारी कीनी ही अर 2 अगस्त 2020 ने लिखित परीक्षा लीनी ही। इम्तिहान रा नतीजा रो 26 नवंबर 2020 ने ऐलाण कर दियो ज्यो हो, ज्यी पाछे इंटरव्यू रा दस दौर पूरा कर लिया ज्या हा। हालांकि, 6 अक्टूबर 2023 ने सुप्रीम कोर्ट ई भर्ती परीक्षा पाछे नौकरी देवण परां रोक लगा दीनी ही।

पशुपालन मंत्री जोराराम कुमावत अदालत रा फैसला रो स्वागत कीनो है। वे कह्यो के इण ऊं नौजवानां ने नौकरी मिलण सागे ई राज्य रा पशुपालन हलका ने ई मजबूती मिलेला। वे कह्यो के महकमो आं उम्मीदवारां ने नौकरी देवण री प्रक्रिया बेगी ई सरू करेला।

00000

जैसलमेर जिला रा पोकरण मांय बीएसएफ री 87वीं बटालियन रो स्थापना दिवस आज धूमधाम सागे मनायी ज्यो। ई मौके संवारे री पोर नेपालेश्वर महादेव मंदिर ऊं गुरुद्वारा तांई तिरंगा यात्रा निकाली ज्यी।

000

राजस्थान विश्वविद्यालय रा स्नातक कोर्स मांय दाखिला रो काम 3 ऊं 12 जून ताई व्हेला। सात हज़ार ऊं बत्ती सीटां माथे दाखिला सारु अर्जियां मांय 13 अर 14 जून ने गलतियां सुधारण रो मौको दियो जावेला। ई पाछे बी.ए., बी.कॉम., बी.एस.सी. पास अर ऑनर्स कोर्स अर दूजा सर्टिफिकेट कोर्स मांय दाखिला दिया जावेला। प्रदेश री सरकारी आई.टी.आई. मांय दाखिला रो काम ई 10 जुलाई ताई चालेला। उम्मीदवार राजस्थान सरकार रा पोर्टल `वण्तरेंजींदण्हवअण्णद या ई-मित्र कियोस्क रे मार्फत अर्जियां दाखिल कर सके है।

000

देश मांय उनाळा मांय बिजली री बत्ती मांग रे बावजूद ताप बिजली घरां मांय कोयलो पर्याप्त मात्रा मांय मौजूद है। कोयला मंत्रालय रे मुजब आं कारखानां मांय कोयला रो भण्डार 45 मीट्रिक टन ऊं बत्तो है, जो लारला साल री तुलना मांय 30 फीसदी बत्तो है।

मंत्रालय रे मुजब कोयला रो ओ भण्डार बिजली री 19 दिन री जरूरत पूरी कर सके है। मंत्रालय उम्मीद जतायी है के बिजली बणावण रा आं कारखानां मांय एक जुलाई ताई 42 मीट्रिक टन ऊं बत्तो कोयलो मौजूद व्हेला।

000

लोकसभा चुनाव रा बारा मांय आज भारतीय जनता पार्टी रा जयपुर मांय प्रदेश मुख्यालय मांय खास मीटिंग राखी ज्यी। पार्टी रा प्रदेश अध्यक्ष सी.पी. जोशी री सदरत मांय राखी ज्यी मीटिंग मांय केंद्रीय मंत्री गजेंद्र सिंह शेखावत अर कैलाश

चौधरी, राज्य मांय पार्टी री सह-प्रभारी विजया राहटकर, लोकसभा चुनाव मांय पार्टी रा उम्मीदवार, पार्टी रा ओहदादार अर विस्तारक शिरकत कीनी। मीटिंग मांय लोकसभा हलका वार विगतवार चर्चा करी ज्यी।

00000

बूंदी मांय भारत स्काउट गाइड अर जिला विधिक सेवा प्राधिकरण री ओर ऊं राख्यी ज्या तंबाकू निषेध कार्यक्रम रा तैत बहादुर सिंह चौराहा माथे नुक्कड़ नाटक राख्यी ज्यो। ई रे जरिये लोगां ने तंबाकू काम लेवण रा नुकसान रा बारा मांय जाणकारी दीरीजी अर तंबाकू काम नी लेवण री सौगंध दिरायी ज्यी।

000

कोटा रा माल डिब्बा मरम्मत कारखाना मांय लारला महीना 6 सौ 62 डिब्बां री मरम्मत करीज्यी, जो साल 1960 मांय ओ कारखानो खुलण ऊं हाल तांई री सब ऊं मोटी तादाद है। इण ऊं पैली सितम्बर, 2021 मांय 6 सौ 61 डिब्बां री मरम्मत करी ज्यी ही।

00000